



Mahein Nian Lian Nú. 34, 16 de Maiu de 2012

Hanoin Ida Ba Prezidenti Eleitu Kona-bá Serbisu Casa Militar¹

Introdusaun

Prezidente da Repúblika maka estadu nia xefe ne'ebé representa no garante nasaun nia independénsia, estadu nia unidade no instituisaun demokrátika sira nia funksionamentu regulár. Prezidente da Repúblika maka forsa armada sira nia komandante supremu.² Prezidenti da Repúblika atu ezerse nian knáar, hetan apoiu husi orgaun serbisu seluk hodi apoiu dezenvolvimentu asaun instituisional no promove prioridade polítika ne'ebé nia difini.³ Estrutura Prezidencia da Repúblika iha orgaun serbisu ne'ebé apoiu mak kompostu husi Casa Sivil, Casa Militar, Sekretariadu Pesoal Prezidenti da Repúblika no Konsellu Administrativu.⁴

Iha Fundasaun Mahein (FM) nia Lian Nú. 34 ida ne'e, FM halo ánaliza ba lalaok serbisu Casa Militar nian iha ámbitu nu'udar orgaun ne'ebé fo asesoria bá Prezidenti da Repúblika kona-bá situasaun militar, defeza no siguransa. FM halo mos ánaliza bá serbisu tékniku sira ne'ebé atribui bá Casa Militar nia kompetensia, ne'ebé integra mos Oficial PNTL (Polisia Nasional Timor-Leste) iha estrutura Casa Militar nian nu'udar hakerek iha Lei Organika Prezidenti da Repúblika.

Kompetensia no Funksionamentu Casa Militar

1. Kompetensia

Casa Militar hanesan orgaun apoiu bá Prezidenti da Repúblika hodi ezerse nian funsaun nu'udar komadante supremu forsa armada iha ambitu defeza no siguransa nian.⁵ Iha natureza Casa Militar nian atribui mos kompetensia ne'ebé kompete bá Casa Militar mak informa bá Prezidenti da Repúblika kona-bá situasaun militar nian, defeza no siguransa, interna no internasional kona-bá kestaun estratejia ho interese defeza no siguransa nasional nian.

Fo assistensia bá Prezidenti da Repúblika hodi hala'o nia funsaun iha ámbitu defeza no siguransa nian. Apoiu Prezidenti da Repúblika iha serimonia no aktu públiku seluk sivil no

¹ Casa Militar (Portugues) – Uma Militar (Tetun): Hanesan orgaun ne'ebé fo apoiu ba Prezidenti da Repúblika nu'udar Komandante Supremo Força Armada iha asuntu Militar, Defeza no Siguransa.

² Konstituisaun Repúblika Demokrátika Timor-Leste, Artigu 74, Númeru 1 no 2).

³ Decreto do Parlamento Nacional N.º 3/2011 de 01 de Junho Lei Orgânica da Presidência da República.

⁴ Artigu 2, Decreto do Parlamento Nacional N.º 3/2011 de 01 de Junho Lei Orgânica da Presidência da República.

⁵ Kapitulo III, Artigu 23. Decreto do Parlamento Nacional N.º 3/2011 de 01 de Junho Lei Orgânica da Presidência da República.

militar. Prepara asuntu sira ajenda Konsellu Superiór Defeza no Siguransa no apresenta bá Prezidenti da Repúblika antes reuniaun.⁶

2. Estrutura no Funsionamentu

Organizasaun Casa Militar determina husi Prezidenti da Repúblika, tuir proposta husi Xefe Casa Militar, fo asesoria iha espesializasaun militar no sekretariadu espesializadu. Estrutura Casa Militar nian kompostu husi Xefe Casa Militar, Ajudante Kampu, Gabinetei Apoiu Komandante Supremu Forsa Armada no Guarda da Onra, no Asesoria Casa Militar.⁷

Iha atribuisaun serbisu ne'ebé atribui sesaun sira iha Casa Militar nia funksionamentu, Xefe Casa Militar fo apoiu bá Prezidenti da Repúblika iha materia militar nian atu asegura ligasaun Prezidenti da Repúblika ho autoridade militar sira. Koordena ho Xefe Casa Sivil organiza atividade provizoriu hanesan komandante supremu forsa armada nian. Representa Prezidenti da Repúblika wainhira determina.⁸

Ajudante Kampu nia knáar mak sai hanesan serbisu pesoal Prezidenti da Repúblika nian no akompañia nia hala'o funsaun sira ofisial ka buat seluk ne'ebé determina ona, no fo kolaborasaun imediata. Akompañia preparasaun no ezekusaun medida protesaun no siguransa bá Prezidenti da Repúblika iha dezlokasaun hotu-hotu. Dezempeña funsaun Ajudante Kampu ho xefe estadu iha estranjeiru no vizita estadu nian iha teritoriu nasional.⁹

Iha estrutura no funksionamentu Casa Militar nia atribui mos knáar bá Gabinetei Apoiu Komandante Supremu Forsa Armada no Guarda Onra ho nia funsaun fo apoiu bá Prezidenti da Repúblika ne'ebé ezerse nia funsaun nu'udar komandante supremu forsa armada nian. Kompetensia ne'ebé integra iha gabinetei ida ne'e nian mak presta onra protokolar xefe estadu, xefe governu no ofisial sira seluk ne'ebé hala'o vizita ofisial. Nune'e mos presta onra militar iha serimonia ne'ebé organiza husi Prezidencia da Repúblika ka iha fatin seluk ne'ebé Prezidenti da Repúblika iha, ne'ebé nia husu.¹⁰

Asesoria Casa Militar nia knáar mak fo asesoria espesializada bá asuntu defeza no siguransa. Iha Asesoria Casa Militar nian integra ofisiais F-FDTL (FALINTIL-Fosça Defesa Timor-Leste), PNTL no elementu seluk ne'ebé husi sistema integradu forsa nian delega husi Prezidenti da Repúblika.¹¹

⁶ Kapitulo III, Artigu 24 Alinea a to'o d). Decreto do Parlamento Nacional N.º 3/2011 de 01 de Junho Lei Orgânica da Presidência da República.

⁷ Kapitulo III, Artigu 25, Número 1 no 2). Decreto do Parlamento Nacional N.º 3/2011 de 01 de Junho Lei Orgânica da Presidência da República.


⁸ Kapitulo III, Artigu 26, Número 2), Alinea a to'o c). Decreto do Parlamento Nacional N.º 3/2011 de 01 de Junho Lei Orgânica da Presidência da República.

⁹ Kapitulo III, Artigu 27, Número 1, Alinea a to'o c). Decreto do Parlamento Nacional N.º 3/2011 de 01 de Junho Lei Orgânica da Presidência da República.

¹⁰ Kapitulo III, Artigu 28, Número 1 no 2). Decreto do Parlamento Nacional N.º 3/2011 de 01 de Junho Lei Orgânica da Presidência da República.

¹¹ Kapitulo III, Artigu 29, Número 1 no 2). Decreto do Parlamento Nacional N.º 3/2011 de 01 de Junho Lei Orgânica da Presidência da República.

Estrutura Casa Militar iha Gabinetei Prezidencia Repúblika



Fontes: Casa Militar-Prezidencia Repúblika. Kuarta, 25 Abril 2012

3. Oficial PNTL iha Casa Militar

Xefe Casa Militar ajuda husi oficial superiór PNTL ida hodi ezerse nia funsaun ne'ebé nomeia husi Prezidenti da República.¹² Nune'e mos iha asesoria Casa Militar nian integra oficiais F-FDTL, PNTL no elementu seluk ne'ebé husi sistema integradu forsa nian delega husi Prezidenti da República.¹³ Iha âmbito integrasaun oficial PNTL iha Casa Militar, Prezidenti da República hodi ezerse nia funsaun nu'udar komandante supremu forsa armada iha ambitu defeza no siguransa nian. Integrasaun oficial PNTL iha Casa Militar atu kria ekilibriu partisipasaun instituisaun estadu nian liu-liu iha area defeza no siguransa, hodi informa situasaun hotu-hotu iha rai laran bá Prezidenti da República.¹⁴

Prezidenti da República iha nia kualidade nu'udar komandante supremu forsa armada nian, iha mos orgaun konsulta seluk hanesan Konsellu Superiór Defeza no Siguransa. Iha natureza orgaun ida ne'e defini katak Konsellu Superiór Defeza ho Siguransa mak órgaun konsulta Prezidente da República nian bá asuntu sira ne'ebé relasionadu ho defeza, siguransa ho soberania.¹⁵ Kompozisaun husi orgaun ida ne'e nian inklui mos Komadante Jeral PNTL ne'ebé sai hanesan membru Konsellu Superiór Defeza no Siguransa no lidera husi Prezidenti da República.

Iha âmbito ida ne'e, ofisila PNTL iha Casa Militar nia knaar hamutuk ho Xefe Casa Militar atu fasilita Prezidenti da República nia ajenda no diskusaun Konsellu Superiór Defeza no Siguransa nian.¹⁶ Atribuisaun ida ne'e mos difini iha artigu 24, alinea "d" ne'ebé kompete bá Casa Militar prepara asuntu bá ajenda Konsellu Superiór Defeza no Siguransa nian bá Prezidenti da República antes reuniaun.¹⁷ Maibé, integrasaun elementu PNTL iha Casa Militar depende bá política Prezidenti da República nian, karik presiza ka lae, depende desizaun xefe estadu nian. Iha nasaun balu la iha elementu polisia ne'ebé integra iha Casa Militar.¹⁸

Lalaok Serbisu Casa Militar Nian Durante Ne'e

1. Realidade Serbisu Casa Militar

Ánaliza komptensia Prezidenti da República nian, partikularmente iha nia kualidade nu'udar komandante supremu forsa armada nian. Prezidenti da República defini nia objetivu iha âmbito defeza no siguransa, Casa Militar organiza no planeia atividade no dezenvolve nia knaar, kria ligasaun ho forsa armada no irforma situasaun militar nian b'a komandante supremu forsa armada. Maske iha enkontru semanal Prezidenti da República ho Xefe Estadu Maior Jeneral

¹² Kapitulo III, Artigu 26, Númeru 3). Decreto do Parlamento Nacional N.º 3/2011 de 01 de Junho Lei Orgânica da Presidência da República.

¹³ Kapitulo III, Artigu 29, Númeru 2). Decreto do Parlamento Nacional N.º 3/2011 de 01 de Junho Lei Orgânica da Presidência da República.

¹⁴ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

¹⁵ Lei Organika Konsellu Superiór Defeza no Seguransa, Kapitulo I, Artigu 1.

¹⁶ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

¹⁷ Kapitulo III, Artigu 24, alinea d). Decreto do Parlamento Nacional N.º 3/2011 de 01 de Junho Lei Orgânica da Presidência da República

¹⁸ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

forsa armada iha ámbitu estratejiku nian, ne'ebé foka bá dezenvolvimentu instituisaun forsa armada. Maibé, Casa Militar nia funsaun hanesan orgaun operacional ida ne'ebé iha Prezidenti da República nia okos hanesan orgaun asesoria bá Prezidenti da República iha nia qualidade nu'udar komadante supremu.¹⁹

Iha serbisu fo asesoria bá Prezidenti da República, Casa Militar ezerse nia funsaun prepara ajenda enkontru Konsellu Superiór Defeza no Siguransa, apresenta bá Prezidenti da República antes reuniaun. Iha knáar ida ne'e, Casa Militar elabora rezultadu diskusaun ho Prezidenti da República ne'ebé prepara bá reuniaun Konsellu Superiór Defeza no Siguransa nian nu'udar ajenda bá enkontru ne'ebé konvoka husi Prezidenti da República.²⁰ Iha liña koordinasaun serbisu, Casa Militar Koordena ho Casa Sivil hodi prepara bá enkontru Konsellu Superiór Defeza no Siguransa hanesan sekretariadu Konsellu Superiór Defeza no Siguransa. Sekretariadu ida ne'e integra iha Departamentu Apoiu Xefe Casa Sivil ne'ebé iha estrutura Casa Sivil nian.²¹

Casa Militar iha nia responsabilidade Apoiu Komandante Supremo Força Armada no Guarda Onra, presta onra protokolar xefe estadu, xefe governu no ofisial sira seluk ne'ebé hala'o vizita ofisial. Nune'e mos presta onra militar iha serimonia ne'ebé organiza husi Prezidenti da República ka iha fatin seluk ne'ebé Prezidenti da República iha. Sirkuntansia ida ne'e Casa Militar ezerse ninia funsaun koordena ho forsa armada F-FDTL, apoiu pelutaun ida forsa armada nia presta onra protokolar iha serimonia ofisial sira. Hanesan serimonia ofisial estadu nian, presta onra bá vizita ofisial sira no Casa Militar organiza no presta onra protokolar bá estadu sira ne'ebé hato'o nia karta kredensial liu husi embaxador ka xefe estadu rai refere.²² Iha liña koordinasaun ho serbisu protokolar estadu nian, Casa Militar koordena ho Serbisu Permanenti Departamentu Protokolu nian ne'ebé iha Casa Sivil nia estrutura atu organiza serbisu protokolu estadu bá serimonia ofisial ruma.

Dezenvolviementu orgaun ida ne'e nian iha ámbitu hasa'e formasaun kompetensia no qualidade rekursu umanu. Casa Militar nia realizasaun mak organiza kursu defeza no siguransa bá elementu instituisaun militar no polisia inklui organizasaun sociedade sivil sira. Iha formasaun materia defeza no siguransa nian partisipa husi instituisaun F-FDTL, PNTL, Serbisu Nasional Intelejen (SNI), Sekretaria Estadu Defeza (SED), Sekretaria Estadu Siguransa (SES), Ministeriu Negosiu Estranjeiru (MNE), no Siguransa Sivil no Bombeirus.

Kursu ida ne'e partisipa mos husi organizasaun sociedade sivil sira ne'ebé tau matan bá asuntu defeza no siguransa mak hanesan ONG-Fundasaun Mahein inklui OPMT (Organizasaun Popular Mulher Timorense), RENETIL no akademiku sira. Kursu ida ne'e realiza iha tinan 2010

¹⁹ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

²⁰ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

²¹ Kapitulo II, Artigu 7, alinea c). Decreto do Parlamento Nacional N.º 3/2011 de 01 de Junho Lei Orgânica da Presidência da República.

²² Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

no 2011 no sai hanesan fasilitador bá kursu defeza no siguransa husi Escola Superiór da Guerra Brazil, inklui orador nasional no internacional sira seluk.²³

2. Dezafiu

Iha kompozisaun Casa Militar nian kompostu husi Xefe Casa Militar, Ajudante Kampu, Gabinete Apoiu Komandante Supremu Forsa Armada no Guarda Onra, no Asesoria Casa Militar. Iha kompozisaun ida ne'e, ne'ebé integra iha Casa Militar nia estrutura atu hala'o funsaun asesoria bá komandante supremu forsa armada nian. Limitasaun rekursu umanu, partikularmente número elementu ne'ebé integra iha Casa Militar sei menus no koñesementu bá materia defeza no siguransa.²⁴

Iha gabinete Xefe Casa Militar nian agora, hare husi Lei Organika Prezidenti da República nian, felizmente la bele fasilita buat hotu-hotu. Iha kazu ida ne'e difikuldade sei infrenta rekursu umanu iha institusaun laran seidauk kompleta. Xefe Casa Militar lidera husi ofisial superiór forsa armada nian ho diviza Koronel no ajuda husi ofisial superiór PNTL ida ho nia diviza superintendenti. Tanba ne'e, Casa Militar iha nivel estrutural nia eziste ona maibé ninia kompozisaun atu kompleta serbisu Casa Militar nian seiduak kompletu. Daudaun ne'e iha deit Tenenti na'in rua husi forsa armada nian no ofisial na'in rua husi PNTL iha Casa Militar nian seksaun serbisu sira.

Ajudante Kampu nia knáar ne'ebé akompañia Prezidenti da República iha nia vizita ofisial tantu iha iha estranjeiru ka iha teritoriu nasional, daudaun ne'e Ajudante Kampu iha deit na'in ida ho diviza Tenente Koronel. Iha knáar ida ne'e prezisa aumenta Ajudante Kampu ida atu kompleta serbisu ne'ebé iha kompozisaun Casa Militar nian ne'ebé ezekuta medida protesau siguransa bá Prezidenti da República.²⁵

Iha ámbitu Gabinete Komandante Supremu Forsa Armada no Guarda Onra nian, Prezidenti da República seidauk iha pelutaun propria ida forsa armada F-FDTL ne'ebé hala'o nia knáar atu presta onra protokolar no presta onra militar iha vizita ofisial ka serimonia ofisial ruma ne'ebé organiza husi Prezidencia da República. Atualmente, wainhira Prezidencia da República hala'o serimonia ofisial ruma, Casa Militar tenki koordena ho Xefe Estado Maior F-FDTL fasilita pelutaun forsa armada nian bá serimonia ofisial sira.²⁶

Hare bá dezafiu ne'ebé Casa Militar infrenta iha rekursu umanu nian, dadaun ne'e Casa Militar iha asesor militar internacional na'in rua husi Portugal no Cavo Verde hodi fo asesoria bá Casa Militar. Asesor militar nian tulun mak harii Casa Militar iha gabinete Prezidenti da República no fo asesoria bá Casa Militar atu ezerse nia funsaun nu'udar orgaun asesoria bá komandante supremu forsa armada nian. Difikuldade bá rekursu umanu, Prezidenti da República foun sei infrenta mos ida ne'e iha gabinete Casa Militar nian. Tanba ne'e, Prezidenti da República foun

²³ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

²⁴ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

²⁵ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

²⁶ Entrevista ho Xefe Casa Militar-Prezidencia República, Koronel Aluc Descartes. Kuarta, 09 Maiu 2012

ne'ebé sei asume responsabilidade ida ne'e depende ninia desizaun bá nesesidade asesor internasional sira, karik rekursu nasional sira iha konserteza la iha nesesidade atu kontratu asesor intrnacional bá iha Casa Militar.²⁷

3. Vizaun husi Ekipa Vitoria Prezidenti Eleitu Kona-bá Casa Militar

Hafoin kandidatu prezidenti Taur Matan Ruak eleitu nu'udar Prezidenti da Repúblika, nia vizaun bá serbisu Casa Militar nian nu'udar orgaun asesoria. Misaun importante ida husi Prezidenti da Repúblika eleitu mak sei kontinua serbisu ne'ebé la'o ona no kompleta serbisu ne'ebé seidak kompletu. Casa militar sai Hanesan asuntu prioridade atu kontinua serbisu ne'ebé seidak kompleta. Iha funsionamentu Casa Militar nian, sei hamosu tan nukleu peskiza ida ne'ebé koordena ho Departamentu Arkivu, Sentru Dokumentasaun no Nukleu Analiza no Peskiza, iha Serbisu Permanenti, Casa Sivil nian.

Iha nukleu ne'e nia funsaun halo peskiza no analiza bá asuntu defeza no siguransa nian. Nukleu ne'e la'os deit fo asesoria bá Casa Militar maibé fo rekomendasaun mos bá governu kona-bá asuntu defeza no siguransa, partikularmente bá lei no dekretu lei sira ne'ebé produs husi Parlamentu Nasional no governu. Razaun fundamental ida sai hanesan papel importante bá Casa Militar nia rekomendasaun bá Parlamentu Nasional no governu mak dalabarak lei sira ne'ebé produs la tuir realidade ne'ebé iha. Nune'e mos sei halo analiza bá lei sira ne'ebé mai husi Parlamentu Nasional no Governu antes Prezidenti da Repúblika promulga.²⁸

Asuntu asesor internasional, partikularmente asesor sira ne'ebé fo asesoria bá Casa Militar, ekipa sira husi Prezidenti da Repúblika eleitu mensiona katak asesor internasional sira dalaruma sei reduz no troka ho asesor nasional sira, propriu timoroan rasik ne'ebé iha especialidade bá asuntu militar, defeza no siguransa. Maibé, asesor internasional balu sei presiza iha asuntu espesifiku sira.²⁹

Iha funsionamentu Casa Militar liu-liu dezenvolvimentu instituisional nia sesaun serbisu sira iha Casa Militar hanesan Gabinete Apoiu Komandante Supremo Forsa Armada no Guarda de Onra. Presiza kompleta sesaun ne'ebé seidak kompletu, daudaun ne'e seidak iha pelutaun guarda de onra propria ida atu presta onra bá serimonia no vizita oficial sira. Asuntu ida ne'e sei koordena ho Xefe Estado Maior Forsa Armada nian ka F-FDTL atu fasilita pelutaun guarda de onra bá serbisu komandante supremo forsa armada nian, ne'ebé sai hanesan serbisu permanente iha Gabinete Apoiu Komandante Supremo Forsa Armada no Guarda de Onra. Maibé, sei hare fila fali kondisaun forsa armada nian, rekursu to'o ka lae, atu kompleta serbisu ida ne'e.³⁰

²⁷ Entrevista ho Xefe Casa Militar-Prezidencia Repúblika, Koronel Aluc Descartes. Kuarta, 09 Maiu 2012

²⁸ Entrevista ho Ekipa Prezidenti Repúblika Eleitu nian ne'ebé responsabiliza ba asuntu defeza no siguransa. Segunda, 14 Maiu 2012.

²⁹ Entrevista ho Ekipa Prezidenti Repúblika Eleitu nian ne'ebé responsabiliza ba asuntu defeza no siguransa. Segunda, 14 Maiu 2012.

³⁰ Entrevista ho Ekipa Prezidenti Repúblika Eleitu nian ne'ebé responsabiliza ba asuntu defeza no siguransa. Segunda, 14 Maiu 2012.

Konkluzau

Prezidenti da Repúblika atu ezerse nian knáar, hetan apoiu husi orgaun serbisu seluk hodi apoiu dezenvolvimentu asaun instituisional no promove prioridade polítika ne'ebé nia defini. Casa Militar hanesan orgaun asesoria bá Prezidenti da Repúblika iha nia kualidade nu'udar komandante supremu forsa armada.

Iha funsionamentu Casa Militar nian, rekursu umanu sai hanesan dezafiu ida bá lalaok Casa Militar iha âmbito serbisu polítiku no tekniku sira ne'ebé integra iha kompozisaun estrutura Casa Militar nian. Intensifikasaun formasaun rekursu umanu sai hanesan nesesidade urjenti ida bá Casa Militar atu kompleta nia misaun tuir Lei Organika Prezidencia de Repúblika haruka.

Iha nivel koordenasaun instituisional nian, PNTL nian integrasaun iha Casa Militar atu kria ekilibriu partisipasaun instituisaun estadu nian ne'ebé responsabiliza bá asuntu defeza no siguransa. Hanesan orgaun konjuntu ida fo asesoria bá komandante supremu forsa armada iha materia defeza no siguransa.

Importante mos partisipasaun organizaun sosiedade sivil nian atu fo hanoin brillante ruma bá dezenvolvimentu instituisional no dezisaun ne'ebé fo impaktu setor siguransa. Hanesan espasu partisipasaun sidadaun nian atu fo hanoin konstrutivu no hanesan mata dalan ida bá kontrolu sidadaun nian bá orgaun estadu hanesan Prezidenti da Repúblika, partikultamente Casa Militar.

Rekomendasaun

Tanba ne'e, Fundasaun Mahein (FM) fo hanoin ida katak Casa Militar presiza hadia:

1. Haforsa serbisu hamutuk ho organizaun sosiedade sivil sira nia partisipasaun atu fo hanoin konstrutivu bá dezenvolvimentu instituisional nian iha âmbito setor defeza no siguransa nian.
2. Halo publikasaun ba relatoriu sira ne'ebé Casa Militar produs ne'ebé la'os konfidensial atu nune'e públiku bele hatene lalaok Casa Militar nian, liu-liu organizaun sosiedade sivil sira.
3. Intensifika formasaun rekursu umanu iha nivel polítiku no tekniku nian bá materia defeza no siguransa ne'ebé integra iha Casa Militar.
4. Aumenta pelutaun guarda onra nian iha Gabeti Apoiu Komandante Supremu Forsa Armada no Guarda Onra nian.
5. Aumenta ofisial forsa armada nian ida iha serbisu ajudante kampu nian iha gabeti Casa Militar nian.

Referensia

Lei

Konstituisaun Repúblika Demokrátika Timor-Leste.

Decreto do Parlamento Nacional N.º 3/2011 de 01 de Junho, Lei Orgânica da Presidência da República.

Lei Organika Konsellu Superiór Defeza no Siguransa. Tinan 2005.

Intervista

Intervista ho Xefe Casa Militar-Prezidencia Repúblika, Koronel Aluc Descartes. Kuarta, 09 Maiu 2012.

Casa Militar-Prezidencia Repúblika. Kuarta, 25 Abril 2012

Intervista ho Ekipa Prezidenti Repúblika Eleitu nian ne'ebé responsabiliza ba asuntu defeza no siguransa. Segunda, 14 Maiu 2012.